

Erich Bolinius

**(Bericht über den BSV Kickers Emden - Sendung „Flutlicht“ auf Radio Ostfriesland
Donnerstag, 5.1.2012 18.05 Uhr auf 94.0 bzw. 87,7)**

Moin, leev Toehörers,
ansük geev ik an disse Stee ja immer 'n Bericht over dat lesd Spöl van Kickers Emden. Dat kann ik vandaag neet, wall Kickers siet lang Tied keen Spöl mehr utdragen hett. De lesd ansette Spölen sünd ja all wegen mall Weer utfallen.
Siet de lesd Sendung Middent Dezember hett sük so heel völ Neeis för de Vereen Kickers Emden neet daan. Wall hett **Günter Kunz**, de mit **Engelbert Schmidt** lang Tied an de Spitz van Kickers Emden stahn hett, dat Röhr van dat Kickers-Skipp weer overnomen, man wo dat nu wieder gahn deit un of he Kickers noch maal weer up Kurs brengen kann, dat is noch neet rut.

De Insolvenzvertreder hett sük noch maal 14 Daag lange Tied van 't Gericht geven laten, um dann toe entskeden, wo dat mit de Vereen Kickers Emden wieder gahn kann. Sünd noch Deiten in de Kasse van Kickers, dann kann de Spölbedriev wieder gahn un de Vereen word neet uplöst. Wenn dat wieder gahn kann, un Kickers kann de Spölen in Oberliga Neddersassen dörföhren, mit wat för 'n Mannskupp ok immer, dann kann Kickers in de komende Saison 'n neei Start in de Landesliga vörnehmen. Ik hoop natürelk, dat dat so kummt.

In facebook hebb ik ironisch vörslaan, dat sük de Fans as Spölers toe Verfügung stellen sölen. Eenige hemmen wahrhaftig meent, dat dat gahn kann – ofwall se keen Spöler vör disse Klass sünd un ok noch noit in 'n Vereen spölt hemmen. Junge, dor harr 'k neet mit rekend, dat se an so 'n Spijök lövt hemmen.

Ik bün seker, wenn de Vereen neet wegen „Mangels Masse“ uplöst worden mutt, dat Kickers Trainer **Uwe Groothuis** 'n Mannskupp toesamen kriggt, de neet elke Sönndag unnergeiht. **Bernd Grotlüschen** un Torwart **Renè Carstens**, de is an 2. Januar 19 Jahr old worden, dortoe graleer ik van disse Stee heel hartelk, wölen ja wieder maken, so as man in de oostfreeske Bladen lesen kunn. Un wall Kickers Emden 'n heel goed U19-Mannskupp hett, dat kunn man weer bi de Stadtmesterkupp in de Emden Nordseehall sehn, an de eerst Dag hemmen se keen Spöl verloren, löv ik, dat de Spölbedriev wieder gahn kann. In disse A-Joegdmannskupp sünd Spölers, de ok in de eerst Mannskupp van Kickers Emden neet unnergahn, dor bün ik mi seker.

Ja, leev Toehörers un Fans van Kickers Emden, uns all blifft nix anners over, as oftowachten, wo dat wieder geiht. Moi is dat neet, aber wat sall man maken? De Kaar is nu maal an de Wand fahren worden, well ok immer Sküld doran hett. Dat fasttoestellen, brengt im Moment ok nix mehr. Dat mutt later aber maal uparbeidt worden, meen ik.

So, tolesd as immer, 'n lüttje Foetballwitz:

Trainer toe sien Middelstörmer: „Vandaag spölt de neei Butenverteidiger tegen di.“
„Dat kann ja heel mall för mi worden. De trappt doch up alls, wat sük bewegt.“
„Dann hest du ja nix toe verwachten!“

So leev Toehörers van Radio Oostfreesland,
ik hoop, Joe hett dat Plattdütsk gefallen, denn mien Motto heet ja alltied,
plattdütsk dürt netto so as Kickers Emden – neet unnergahn.
Bit anner Maal
Joe

Erich Bolinius ut Emden-Petjem.